

Jenosseschaff

T+M : KLABES



Do mäs de Dür op, jeis eren, un plötzlich steis do meddendren,
En dem kleine Jlöck, wat sich dinge Wohnung nennt,
Do kenns ding Veedel, dinge Stroß, all die Minsche he em Huus,
en dem mer Dich allt lang, als jode Nohber kennt,
För de Frau Schmitz vun nevvenan, nemms do jähn e Päckche an,
Jeis för dä ahle Webers bovven ens mim Hungk,
Un bruch et Tina ens en Ei, jo dann jiß do ihr allt zwei,
denn joode Nohberschaff, die brengste op dr Punkt.

REF.: En dr Jenosseschaff, jeit zwar de Poß nit aff,
doch wellste ruhich un secher wonne, bes do he nit in de Bunne,
Bei ner Meet, die mer sich noch leiste kann,
en dr Jenosseschaff do bes do jlöcklich dran.

Do bes zick Johre Mitjlied he, dat wor en wunderbar Idee,
domols vun dr Mamm, he Jeld zo investiere,
Zickdem bes do he Zehuus, bruchs nit mih us dr Wohnung russ,
Doch su jet muss dr Minsch zoesch ens lihre,
Un weed de Heizung ens nit wärm, nimp Dich he keiner op de Ärm,
Do bruchs nor ahnzerofe un et weed jemaat,
Plötzlich schellt et an dr Dür, steiht he ald do d´r Herr Monteur,
un do häss noch nit ens zwei Daach drop jewaat.

REF.: En dr Jenosseschaff....

Wie ein Familich steit mer do, un dem de entreck weed schnell klor,
dat en dem Lade Freud un Leid, janz eng zesamme steit.
Weed dr Frau Meyer et zovill, klopp die flöck mem Besemstill,
an de Deck, weil bove einer zo scheef singe deit,

Kütt drette Stock e Kind zur Welt, weed unge dä Pastor bestellt,
määät de Frau Jroß em Ädjeschoss ehr Auge zo.
Dun sich de Müllers morje trenne, un zom Scheidungsanwalt renne,
trick en dä Wunnung nevvenan dr Huusfründ en

REF.: En dr Jenosseschaff.....

Doch op eins dun die em Büro Wääät drop läje,
dat mer et Huus, dä Hoff un och dä Keller fäje,
weed dat verjesse, heis et flöck “die ahle Wutz”
dä hätt ald widder nit et Treppehuus jeputz....

REF.: En dr Jenosseschaff....